



Perdana Menteri saksi demonstrasi maritim LIMA '23

Oleh M Hifzuddin Ikhsan - Mei 23, 2023 @ 6:55pm
hifzuddin@bh.com.my

LANGKAWI: Perdana Menteri, Datuk Seri Anwar Ibrahim hari ini, menyaksikan persembahan khas bersempena perasmian Pameran Antarabangsa Aeroangkasa dan Maritim Langkawi 2023 (LIMA '23).

Persembahan terbabit menampilkan pertunjukkan khas pasukan elit dan aset pertahanan maritim negara milik Tentera Laut Diraja Malaysia (TLDM), Agensi Penguatkuasaan Maritim Malaysia, Polis Diraja Malaysia, Jabatan Kastam Diraja Malaysia, Jabatan Bomba dan Penyelamat Malaysia serta Jabatan Perikanan.

Turut ditampilkan demonstrasi khas penyusupan pasukan penyelam menggunakan jet ski dengan membawa kompas perasmian ke hadapan pentas untuk diaktifkan Perdana Menteri sebagai gimik perasmian, sebelum disusuli demonstrasi bot maritim.

Demonstrasi terbabit gabungan kepakaran Pasukan Khas Laut (PASKAL), Pasukan Tindakan Khas dan Penyelamat (STAR), Unit Gempur Marin PDRM dan Jabatan Laut Malaysia bersama aset permukaan dan udara.

Yang turut hadir Menteri Pertahanan, Datuk Seri Mohamad Hasan; Menteri Luar, Datuk Seri Zambry Kadir; Menteri Besar, Datuk Seri Muhammad Sanusi Md Nor dan Panglima Tentera Laut, Laksamana Abdul Rahman Ayob.

Selain itu, turut diadakan persembahan gerakan pantas taktikal aset maritim antaranya bot tempur, kapal peronda dan helikopter milik agensi pertahanan negara.

Persembahan terakhir ialah pertunjukan terbang dan pelayaran lintas hormat membabitkan pesawat udara serta bot sebagai penghormatan kepada perdana menteri.